

DBKL sita 11 aktiviti perniagaan sekitar ibu kota

KUALA LUMPUR -

Sebanyak 11 aktiviti perniagaan diambil tindakan sita dan pindah barangan perniagaan dalam serbuan Dewan Bandaraya Kuala Lumpur (DBKL) di sekitar Taman Sri Rampai, Jalan Wangsa Delima dan Taman Danau Kota di sini pada Rabu.

Operasi Tindakan Khas Pindah Halangan Tempat Awam bermula jam 9 malam itu dijalankan DBKL melalui Jabatan Penguatkuasaan dengan kerjasama Pejabat Cawangan Setiawangsa.

Menerusi operasi tindakan khas itu, DBKL memaklumkan, pihaknya membuat pemeriksaan di restoran dan gerai penjaja yang melakukan kesalahan meletakkan barangan perniagaan di tempat awam seperti laluan siar kaki, kaki lima premis, petak parkir dan atas jalan.

"Tindakan sita dan pindah peralatan perniagaan ini melibatkan lima buah premis restoran dan enam



Anggota penguat kuasa DBKL melakukan operasi sita dan pindah peralatan perniagaan di sekitar ibu kota.

gerai peniaga yang membuat halangan di tempat awam di bawah kesalahan Seksyen 46, Akta Jalan Parit dan Bangunan 1974.

"Kesemua peralatan melibatkan kerusi, meja plastik, gerai beroda, tong gas, rak besi, dapur dan lain-lain dipindah ke stor sitaan DBKL, Jalan Lombong,

Taman Miharja di sini untuk tindakan rekod dan dokumentasi," katanya dalam satu kenyataan di Facebooknya.

Dalam pada itu, DBKL memaklumkan pihaknya akan meneruskan operasi seperti itu secara berkala di setiap 11 Parlimen sekitar ibu kota.